

# Акафист Пресвятой Богородице, перед Ея иконой, именуемой «Почаевская»

## **Кондак 1**

Взбранной Воеводе родов христианских и страны наша известней Избавительнице хвалебныя песни принесем, вернии, на святей горе Ея собравшеся; Ты же, яко имущая милосердие неизреченное, О Владычице Богородице, моления нашего пред чудотворным Твоим образом возносимаго не отвержи, да в умилении сердец зовем Ти:

Радуйся, Похвало Почаевская и всего мира Надеждо и Утешение.

## **Икос 1**

Архангел Гавриил первое «Радуйся!» тебе приношаще, Владычице, егда зачатие Сына Божия благовествоваше, по преславнем же Успении Твоем вся Небесныя силы туюже хвалу на Небеси Тебе непрестанно приносят; како убо мы, грешнii, своя гласы с гласы Безплотных совокупити дерзнем? Обаче милосердие Твое ко всем кающимся поминающе, устне наша со страхом и любовию отверзаем, глаголюще сице:

Радуйся, милости бездно; Радуйся, любве неистощимое море. Радуйся, рода христианского Благая Предстательнице; Радуйся, обители Почаевского стено нерушимая. Радуйся, православныя люди на гору Почаевскую узами любве привлекающая; Радуйся, всякую печаль от душ их отгоняющая. Радуйся, Еяже чудотворный образ, яко звезда, от горы Почаевской нас путеводствует; Радуйся, Ейже возносимыя молитвы страстныя прилоги вскоре отражают. Радуйся, явлением Своим на горе сей люди утешившая; Радуйся, след стопы Твоей на ней нам оставившая. Радуйся, верных присное дерзновение; Радуйся, сумнящихся доброе утверждение.

Радуйся, Похвало Почаевская и всего мира Надеждо и Утешение.

## **Кондак 2**

Видевше пустынницы почаевстии и простец Иоанн босый Пресвятую Богородицу на скале во огненном столпе явльшуюся, след стопы Ея налобызаху и водою, где камени истекшю, окропляяся, вопияху Богу: Аллилуia.

## **Икос 2**

Разум недоразумеваемый о явлении Твоем, Владычице, ищащие, в сицевом упование утверждается, яко первое от агарян, послежде от

еретиков оплот Православия на горе Почаевстей утвердити благоволила еси, сего ради в Твой святый храм приходяще, теплою верою сердца наша исполняем, глаголющи:

Радуйся, истинныя веры утверждение; Радуйся, зловерия явное обличение. Радуйся, древле в Неопалимей Купине Синайстей известившаяся; Радуйся, христианом в столпе огненном зде явившаяся. Радуйся, яко в пещи горящей, росою спасении, Авраамстии отроцы Тя предзвестиша; Радуйся, яко водою от следа стопы Твоей исцелении благодать Твою проповедаша. Радуйся, землю нашу, древле от агарян разоренную, явлением Твоим тогда утешившая; Радуйся, и ныне многими знаменьми молящаяся зде ободряющая. Радуйся, кающихся скорое услышание; Радуйся, подвзывающимся помочь и прибежище. Радуйся, и неведущих вразумление; Радуйся, и малодушных укрепление.

Радуйся, Похвало Почаевская и всего мира Надеждо и Утешение.

### **Кондак 3**

Силу сугубыя благодати явила еси, Владычице, на горе Почаевстей, егда место явления Твоего по трех стех летах чудотворною иконою Свою обогатила еси, юже рукою святителя Неофита Еллина, из Москвы грядущаго, первее боярине Анне даровала еси, потом же от нея во обитель Почаевскую прияла еси, радующимся людем и поющим Богу: Аллилуиа.

### **Икос 3**

Имуши в дому своем икону Твою, Владычице, бояриня Анна, и исцеление от нея слепорожденному брату своему Филиппу бывшее уведевши, абие духом ревности о славе Твоей возгоре и обитель из камене во имя Пречестнаго Успения Твоего пустынником почаевским устрояет, в ней же чудотворному образу Твоему поклоняющися взыывает сице:

Радуйся, сокровище богатное в Твоей святей иконе нам преподавшая; Радуйся, святителя рукою дарованным образом Твоим землю нашу освятившая. Радуйся, души наша от земного богатства отвращающая; Радуйся, Славу Божию пети нас научивающая. Радуйся, яко чудеса Твоя зряще, к Небеси сердцы своими восхищаемся; Радуйся, яко во обители Твоей, аки в преддверии рая обретаемся. Радуйся, православныя люди иконою Твою утешившая; Радуйся, от всех стран молящаяся люди во обитель Почаевскую призывающая. Радуйся, еюже вера умножается; Радуйся, еюже уныние отгонится. Радуйся, иноков почаевских присное Радование; Радуйся, мирских людей непостыдное Упование.

Радуйся, Похвало Почаевская и всего мира Надеждо и Утешение.

### **Кондак 4**

Буря еретического неистовства на святую обитель Твою устремившияся, Владычице, святую икону Твою рукою злых иконоборцев пленивши и на злохуление тех подвигши, вскоре гневом Божиим удержана бысть, егда невидимая сила безступне пиршествующия хульники, аки Артаксеркса и Ирода, сляче и в недуг вверже, над святынею Твою ругавшихся и не уведевших пети: Аллилуиа.

### **Икос 4**

Слышаша иноцы почаевстии и вси православнии людие, яко святая икона Твоя по седминадесятих летех еретического пленения во святую обитель от посрамленных хулителей возвращается, аbie на сретение ея изыдоша и плач свой на радость преложше, вопияху Тебе:

Радуйся, христианом прибежище; Радуйся, еретиков обличение. Радуйся, обитель Почаевскую иконы Твоей до конца не лишившая; Радуйся, злохуление иконоборцев посрамившая. Радуйся, яко в бедах не унывати и нас научаеши; Радуйся, яко Правосудию Божию веровати нам повелеваеши. Радуйся, Еюже Православие во стране нашей утвердися; Радуйся, Еюже и вся вселенная воплощенную истину прияти сподобися. Радуйся, долготерпение Божие подражающая; Радуйся, в терпении люди Твоя утверждающая. Радуйся, яко смиреннии Тобою утешение приемлют; Радуйся, яко горделивии Тобою смиряются.

Радуйся, Похвало Почаевская и всего мира Надеждо и Утешение.

### **Кондак 5**

Боготечная звезда ищущим спасения явилася еси, Владычице, к Солнцу Правды сих приводящая, якоже бо в земнем житии Твоем о людех Предстательница к Сыну Твоему в Кане Галилейстей показалася еси, тако и по преславном Твоем на Небеса отшествии, моления о верных от конец земли приносимая к Сыну Твоему возносиши и зде, на горе Почаевстей, исцеления многоразличная от Него людем подаеши, вопиющим Богу: Аллилуиа.

### **Икос 5**

Видеша людие, на гору Почаевскую, якоже в древняя, тако и в последняя лета притекающии, множества исцелений, Тобою подаваемая, в желании спасения души своя утверждаху и о гресех своих покаяние теплое приношаху, вопиюще Тебе:

Радуйся, слепых прозрение и хромых исцеление; Радуйся, бесных от демонов избавление. Радуйся, плененного инока во обитель Твою на воздухе чудесне возвратившая; Радуйся, младенца Симеона

предумерша по молитве старицы воскресившая. Радуйся, яко в сих знамениих сила древних чудес Твоих людем паки явися; Радуйся, яко исцеления от святыя иконы Твоей и в последняя дни не оскудеша. Радуйся, во всем мире источник исцелений от святых икон Твоих подающая; Радуйся, паче сих духовными дарованьми молящаяся обогащающая. Радуйся, Еюже православнии роди хвалятся; Радуйся, к Еяже помощи и маловернii притекают. Радуйся, земнородных упование; Радуйся, Небесных чинов радование.

Радуйся, Похвало Почаевская и всего мира Надеждо и Утешение.

### **Кондак 6**

Проповедницы славы Пречистыя Девы явишася агаряне на обитель Почаевскую нашедши и видения Пречистыя Богородицы с преподобным Иовом первее не уразумевши; егда бо стрелы, от них пущаемыя, паки на ня устремиша, аbie силу Владычицы проразумевше и покаяние о безумии своем принесше, верою возопиша: Аллилуia.

### **Икос 6**

Возсия видение Твое, Владычице, на горе Почаевстей, егда братия обители, зело от агарян осаждаема, с велиим воплем моление пред святою Твою иконою и пред ракою преподобнаго Иова возношаще, егда же братия агаряны, видением сим смятенныя и бежащия, виде, аbie с веселием воспе Тебе сице:

Радуйся, Избавительнице наша и спасение; Радуйся, рода христианского присное вспоможение. Радуйся, нечестивыя враги от Твоей святыни отгнавшая; Радуйся, в покаяние их приводящая. Радуйся, Еяже и невидимии спасения нашего врази трепещут; Радуйся, Ейже Святии Ангели и преставльшиися праведницы на Небеси поклоняются. Радуйся, преподобнаго Иова в молитву с Собою приемшая; Радуйся, агаряны ко Святому Крещению видением Своим приведшая. Радуйся, яко Тобою верний страх смертный в конец отложиша; Радуйся, яко Тебе ради нецы от агарян богообоязненни иноцы зде явишася. Радуйся, истины присное изъявление; Радуйся, заблуждающимся доброе вразумление.

Радуйся, Похвало Почаевская и всего мира Надеждо и Утешение.

### **Кондак 7**

Хотящи желание Вечнаго Живота возгрети в сердцах христианских, Пресвятая Богородица болящия чудесы Своими исцеляет, бесы изгоняет, плененные свободжает, мертвые воскрешает, да мы вси, силу Божию уразумевше, земная возненавидим и о душах своих попечение приложим, непрестанно вопиюще Богу: Аллилуia.

### **Икос 7**

Новыя и тягчайшия беды претерпе обитель Почаевская, егда вкупе со всею страною от Православия лестию отторженная во обладание еретиков вдадеся, обаче прошедшим стом и десятим летом паки православным христианом вдана бысть, в нюже православнии иноцы, пришедшe и святыя мощи преподобнаго Иова изпод спуда изъемше, к чудотворному образу Владычицы припадаху, глаголюще:

Радуйся, Православия защитнице; Радуйся, еретиков обличительнице. Радуйся, обитель Твою до конца не оставившая; Радуйся, страху Божию нас научающая. Радуйся, яко представительством Твоим страна Волынская паки ко Православию возвратися; Радуйся, яко от лет древних мнози еретицы Твоим вразумлением исправишаися. Радуйся, во святую Лавру Твою верных на молитву паки призывающая; Радуйся, и неверныя зде поклонятися православней святыне научающая. Радуйся, Юже праведницы и праведнii непрестанно воспевают; Радуйся, в Нейже и падшии в покаянии притекают. Радуйся, отступников к вере возвращение; Радуйся, прельщаемых к свету истины возведение.

Радуйся, Похвало Почаевская и всего мира Надеждо и Утешение.

### **Кондак 8**

Странное чудо зrim o Тебе, Богомати, елико бо телеснии недузи святыя Твоя иконы целованием и воды почаевский кроплением исцеляются, тако и душевныя страсти видением святыни Твои отъемлются, вера утверждается и умиления сердца наша исполняются, поющих Богу: Аллилуia.

### **Икос 8**

Весь аз недостойный грехами исполнился, мирскому рассеянию вдався и о души своей вознерадев, обаче на святую икону Твою, Владычице, взирая, и просвещение от нея безчисленным людем, зде приходящим, видя, паки на путь спасения устремляюся и в радости сердца воспеваю Ти сице:

Радуйся, чистоты сокровище; Радуйся, милостей бездно. Радуйся, к Сыну Твоему о верных моления выну приносящая; Радуйся, моления грешных не отвергающая. Радуйся, яко Тобою мнози отчаяния греховнаго избегоша; Радуйся, яко призывающии имя Твое от падения странного возсташа. Радуйся, Еюже иконоборчная ересь во вселенней посрамися; Радуйся, Еюже истинная вера Волынской стране возвратися. Радуйся, к подвигу целомудрия души возводящая; Радуйся, обидящим прощати научающая. Радуйся сердец наших умиление; Радуйся, душ наших упование.

Радуйся, Похвало Почаевская и всего мира Надеждо и Утешение.

### **Кондак 9**

Всякия отступства и еретическая блуждания покаявшемуся народу земли Волынского отпустила еси, Владычице, и паки источник исцелений от чудотворных Твоих иконы от следа стопы Твоей на горе Почаевской в православной Лавре Твоей людем открыла еси, токмо аще покаяние о грехах своих принесут Богу и о Твоей помощи не сумнящиеся, возопиют ему: Аллилуя.

### **Икос 9**

Ветия славы Твоей явишася, Владычице, слепии и хромии исцеление от Твоих иконы, православным людем возвращенныя, приявши, яко и еретической жене некоей болящей, Тя в помощь призвати и по исцелении истинную веру исповедати и облобызати, нам же вопити Тебе сице: Радуйся, Царя Небесного умоление:

Радуйся, земных присное представительство. Радуйся, от лютерских заблуждений жену некую недуга исцелением отвратившая; Радуйся, вся люди во истине Православия уверившая. Радуйся, яко Тебе ради православии людие столькраты прельщения агарянская победиша; Радуйся, яко Тебе ради и совращении от латын паки православную веру облобызаша. Радуйся, к Нейже вси живущии молитвенно очи воздвизают; Радуйся, Юже и молящиися о упокоении умерших в помощь призывают. Радуйся, и от житейских нужд притекающая к Тебе изъемлющая; Радуйся, паче сих всякия нужды претерпевающим крепость дарствующая. Радуйся, христолюбивому воинству во бранех вспоможение; Радуйся, на демоны воинствующим благое наставление.

Радуйся, Похвало Почаевская и всего мира Надеждо и Утешение.

### **Кондак 10**

Спасти хотяше, Пречистая Богородица, препростую некую старицу во ослеплении латынством бывшую и внуку малую имущую, Православием убо просвещенную, но телесными очесы слепотствующу, темже сима обема благое желание влагает, еже на горе Почаевской чудотворному Ея образу поклонитися, идже абие слепую отроковицу чудесне исцеляет и старицу православную веру исповедати научает, вопиющую Богу: Аллилуя.

### **Икос 10**

Стена нерушимая истинная веры явилася еси, Владычице, зане якоже нечестивии еретицы от прославления Тебе, яко Истинная Богородицы, со упорством отвергоясь, тако и православии в вере Твоей тверди пребыва, и от молитв непрестанно Тебе приносимых николиже отвратитися восхощут, и сих ради еретических глагол во утеса своя принимати не дерзнут, но сердцем благодарным восхваляти Тя не престанут, глаголюще:

Радуйся, Христианом отрадо и утешение; Радуйся, ангельским чином славо и поклонение. Радуйся, от льстивых глагол еретических нас отвращающая; Радуйся, памятованием милостей Твоих умы наша к Богу возносящая. Радуйся, святыя апостолы ко Успению Твоему на облацах воздушных призвавшая; Радуйся, и грешныя люди в той день на гору Почаевскую в тысячаах и тмах на всяко лето собирающая. Радуйся, Еяже ради христиане трудность пути, аки сладкое упокоение, подъемлют; Радуйся, Еяже ради и ленивии подражати им тщатся. Радуйся, иноком сладость мирскую забыти благодатию Твою пособствующая; Радуйся, вспять озирающаяся сновиденьми грозными устрашающая. Радуйся, Церкве Христовы лучшая диадимо; Радуйся, страны наша щите неодолимый.

Радуйся, Похвало Почаевская и всего мира Надеждо и Утешение.

### **Кондак 11**

Пение благодарное о Твоих, Владычице, благодеяниях во всем мире от христиан возносимое, аки фимиам к Небеси непрестанно восходящий помышляюще и наша убогая хваления не отвратити Тебе просим, еще же и благодать покаяния даровати Тебе молим, со упновением поюще Богу: Аллилуиа.

### **Икос 11**

Свет живота временного и Вечныя Жизни упование явилася еси, Владычице, человеку некоему в Бессарабии умрети имущему, но внезапу, по вкушении воды от святыни Почаевского, здраву бывшему, еже сродницы его видевше, со страхом и умилением Тебе воззваша:

Радуйся, боляющих исцеление; Радуйся, скорбящих слышание. Радуйся, Тобою бо смерть пришедшая отгнася; Радуйся, Тобою бо вера несомненная нам даровася. Радуйся, яко предвещание Гавриила пред очиу нашею сбывається; Радуйся, яко от всех родов, по глаголу Твоему, ныне и присно ублажаєшися. Радуйся, гору Почаевскую, яко место пребывания Твоего освятившая; Радуйся, аки второй Назарет тую явившая. Радуйся, яже никогоже упования отвратившая; Радуйся, всех молитвы тепле приемлющая. Радуйся, здравие нам подавающая; Радуйся, ко спасению нас возводящая.

Радуйся, Похвало Почаевская и всего мира Надеждо и Утешение.

### **Кондак 12**

Благодать исцелений и умиления молитвенного от Твоя, Владычице, иконы источаемая, да не вотще душам нашим будет, аще бо грех ради во окамененное бесчувствие впадохом; обаче, яко имущая власть мертвяя воскрешати, и наше пробуди душевное омертвение, и помыслом лучшим сердца наша озари, да греховную прелесть возненавидевше, воспоеи Богу: Аллилуиа.

## **Икос 12**

Поюще Твоя чудеса во обители Почаевстей явленная, молим Тя, Владычице, лица Твоего от страны нашея не отврати, но и всем приходящим на святую гору Твою и милости от Тебе ищущим во благое прошение исполни, да вси воспоют Ти сице:

Радуйся, всеправедного Бога умилостивление; Радуйся, христиан ко Христу дерзновение. Радуйся, торжество веры в Лавре Твоей являющая; Радуйся, сердца человеков любовию распаляющая. Радуйся, яко древним чудесем подобное зде видети людие сподобиша; Радуйся, яко гора сия, аки второй Синай, в странах христианских прославися. Радуйся, Бога на земли явльшагося во чреве Твоем понесшая; Радуйся, человеки молитвою Твою к Богу возносящая. Радуйся, икону Твою, яко проповеднику спасения во обители Твоей оставившая; Радуйся, след стопы Твоей, целебною водою исполняемый, чудесы прославившая. Радуйся, с Небесных высот на рабы Твоя призывающая; Радуйся, на благия деяния верныя наставляющая.

Радуйся, Похвало Почаевская и всего мира Надеждо и Утешение.

## **Кондак 13**

О всепетая Мати Христа Бога, вся роды христианским любовию Себе всыновившая достойныя похвалы воспети Тебе недоумеем мы, грешнии, обаче любовию Твою побеждаеми и к Твоему чудотворному образу очи своя возносяще, молим Тя: в борении и нуждах наших не остави чад Твоих, заступлению Твоему тепле верующих и Сыну Твоему вопиющих: Аллилуиа.

(Этот кондак читается трижды, затем икос 1 и кондак 1)

## **Молитвы к Пресвятой Богородице перед Ея иконой, именуемой «Почаевская»**

### **Молитва первая**

О, Всемилостивая Госпоже, Царице и Владычице, от всех родов избранная, и всеми роды небесными и земными ублажаемая! Воззри милостивно на предстоящий пред святою иконою Твою и усердно к Тебе молящийся народ сей, и сотвори представительством и заступленном Твоим у Сына Твоего и Бога нашего, да никтоже изыдет отсюду упования своего тощ и посрамлен в надежде своей, но да примет кийждо от Тебе вся, по благому изволению сердца своего и по нужде и потребе своей, во спасение души и во здравие телу. Призри благосердием, Всепетая Богородице, и на обитель сию, Твоим именем нарицающуюся, юже от лет древних возлюбила еси, избравши ее в

достояние себе, и неоскудно источающи токи исцелений от чудотворныя иконы Твоей и от приснотекущаго источника, в следе стопы Твоей, нам открытаго, и сохрани ю от всякаго прилога и навета вражия, якоже древле сохранила еси Твоим явлением целу и неврежденну от лютаго нашествия агарянскаго, да выну воспевается и славится в ней Пресвятое Имя Отца и Сына и Святаго Духа, и Твое преславное успение, во веки веков. Аминь.

### **Молитва вторая**

Царице наша Преблагая, Владычице Преблагословенная, Надеждо наша Богородице! К Тебе умиленно ныне притекаем, и сокрушеню душою и смиренным сердцем молим Тя, Всепетая, пред Пречистым Твоим образом: помяни щедроты Твоя древния, яже от Тебе зде бывшия, и якоже иногда явилася еси на скале Почаевстей, в столпе огненнем, от камене цельбоносную воду источающи, сице и ныне предстани нам, Мати многомощная, и теплотою Богоматерния любве Твоей согрей сердца наша окамененная, слезы любве и покаяния нераскаяннаго от очей наших исторгающи. Ты бо едина еси Заступница наша Богодарованная: Тя убо молим, избави от всех бед, от всякия напасти, болезни и скорби, рабы Твоя, представительством великаго о нас ходатая и молитвенника Твоего, всеблаженного отца нашего Иова, угодника Твоего Почаевскаго, егоже молитве яве внимала еси на воздухе иногда, егда всеславным и страшным явлением Твоим избавила еси обитель Твою от нашествия и обложenia агарянскаго. Призри благосердием, Всепетая, призрением милостиваго Твоего заступления и на все царство и страну нашу, и на вся люди Твоя излей богатыя Твоя милости: разсеянные собери, неверныя же и иноверныя, во странах наших, на путь истинный настави, отпадшая от благочестивыя отеческия веры паки возврати и сопричи их Святей Твоей Православней и Кафоличестей Церкви; в семействах наших мир утверди, старость поддержи, юныя настави, младенцы воспитай, сирья и вдовицы заступи, плененные свободи, болящия уврачуй, на судищи и в темницах, и в заточениих, и в горьких работах сущих помяни, ограждающи ны выну, посещающи и утешающи токами чудес и знамений многоразличных, яже присно изливаеши всем от святыя иконы Твоей цельбоносныя. Даруй, Всеблагая, земли плодородие, воздуха благорастворение и вся, яже на пользу нашу дары благовременныя и благопотребныя, молитвами избранных угодников Твоих, благодатный Твой лик на святей иконе Твоей окружающих: Илии богохваливаго, святаго архидиакона Стефана первострадального, преподобного Авраамия всеблаженного, и богоумужнаго Мины мученика многоименинаго, и с ними купно святых и праведных жен: Параскевы прехвальныя, Ирины преблаженныя и святая Екатерины великомученицы многострадальной, и всех святых. Егда же приспеешь наше от жития сего отшествие и к вечности переселение, сице

предстани нам, Преблагословенная, якоже иногда благопоспешила еси обители Твоей во спасение во время брани Збаражской, и Твоим теплым ходатайством даруй нам христианскую кончину живота нашего безболезненну, непостыдно, мирну и Святых Таин причастну; да якоже в сей жизни, сице и в будущем веце сподобимся вси, молитвами Твоими, бесконечныя небесныя жизни во Царствии возлюбленного Сына Твоего, Господа Бога и Спаса нашего, Иисуса Христа, Ему же подобает всякая слава, честь и поклонение, во веки веков. Аминь.

### **Молитва третья**

О, Пресвятая Дево, Владычице Богородице! Благодарю Тя от всего сердца моего, яко сподобила мя еси грешного и недостойнаго раба Твоего предстati зde и покланятися на святей горе Твоей. О, коликих благ удостоихся тако многогрешный аз милосердием Твоим. Вижду, Пречистая, и ужасаюся, и истаивает дух мой, зря воочию многоцелебный сей источник благодати Твоей, егоже издревле во следе святыя стопы Твоей неизреченно явила еси, и всеблаговейно покланяемся на месте, идже стоясте Девичествии нозе Твои, молю Тя, благословенная Надеждо и Спасение душ и телес наших: омый мя цельбоносною водою Твою от всякия скверны плоти и духа, утоли благодатными струями Твоими вся страсти моя сердечныя, уврачуй каплями от приснотекущаго источника Твоего вся недуги моя телесныя, да, Тобою наставляемый, врачуемый и избавляемый, воспеваю Тебе всеусердно: Радуйся, источниче радости непрестаемыя, радуйся, точе доброты неизреченыя. Радуйся, вожделений нечистых потопление, радуйся, скверн всяких измование. Радуйся, струе световиднейшая во здравие верным от горы приосененныя чащи благодать исцелений подавающая, радуйся, росо небесная, свыше токи премудрости жаждущим истиннаго познания ниспосылающая. Радуйся, похвало Почаевская, спаси ны, молящияся Тебе, Надеждо наша и утешение. Аминь.

### **Молитва четвертая**

К Тебе, о Богомати, молитвенно притекаем мы, грешни, чудеса Твоя во святей Лавре Почаевстей явленная гюминающе и о своих сокрушающеся прегрешениих. Вемы, Владычице, вемы, яко не подобаше нам, грешным, чесого просити, токмо о еже Праведному Судии беззакония наша оставити нам. Вся бо, нами в житии претерпенная, скорби же, и нужды, и болезни, яко плоды падений наших, прозябоша нам, Богу сия на исправление наше попущающу. Темже вся сия истиною и судом Своим наведе Господь на грешныя рабы Своя, иже в печалех своих к заступлению Твоему, Пречистая, притекоша и во умилении сердец к Тебе взывают сице: грехов и беззаконий наших, Благая, не помяни, но паче всечестныя руце Твоя

воздвигши к Сыну Твоему и Богу предстани, да люте содеянная нами отпустит нам, да за премногия неисполненная обещания наша лица Своего от рабов Своих не отвратит, да благодати Своей, спасению нашему пособствующая, от душ наших не отъимет. Ей, Владычице, буди спасению нашему Ходатаица и, малодушия нашего не возгнушавшия, призри на стенания наша, яже в бедах и скорбех наших пред чудотворным Твоим образом возносим. Просвети умиленными помыслы умы наша, веру нашу укрепи, надежду утверди, любве сладчайший дар сподоби нас прияти. Сими убо, Пречистая, дарованьми, а не болезnymи и скорбьми живот наш ко спасению да возводится, но от уныния и отчаяния души наша ограждающи, избави нас маломощных от находящих на ны бед, и нужд, и клеветы человеческия и болезней нестерпимых. Даруй мир и благоустройство жительству христианскому предстательством Твоим, Владычице, утверди православную веру в стране нашей, во всем в мире. Церковь Апостольскую и Соборную умалению не предаждь, уставы святых отец на веки непоколебимы сохрани, всех к Тебе притекающих от рова погибельного спаси. Еще же и ересию прельщенных братии наших или веру спасительную в греховных страстех погубивших паки ко истинней вере и покаянию приведи, да вкупе с нами Твоему чудотворному образу поклоняющиеся Твое предстательство исповедят. Сподоби убо нас, Пречистая Госпоже Богородице, еще в животе сем победу истины Твоим заступлением узрети, сподоби нас благодатную радость прежде кончины нашей восприятии, якоже древле наследники почаевстии Твоим явлением победители и просветители агарян показала еси, да вси мы благодарным сердцем вкупе со ангелы, и пророки, и апостолы, и со всеми святыми Твое милосердие прославляюще, воздадим славу, честь и поклонение в Троице певаемому Богу Отцу, и Сыну, и Святому Духу во веки веков. Аминь.

## Тропарь Пресвятой Богородице перед Ея иконой, именуемой «Почаевская»

### Тропарь, глас 5

Пред святою Твою иконою, Владычице, молящимися исцелений сподобляются, веры истинныя познание приемлют и агарянская нашествия отражают. Темже и нам, к Тебе припадающим, грехов оставление испроси, помыслы благочестия сердца наша просвети, и к Сыну Твоему молитву вознеси о спасении душ наших.

***Величание***

Величаем Тя, Пресвятая Дево, и почитаем честную икону Твою, юже  
от лет древних на горе Почаевстей прославила еси.